

sey, lest man es bey jungst gethaner ordnungk nochmals wendenn, das die hockenn am montage iren marcktt aufm Naumarckte bey den kugelbudenn haltenn, auch nicht an einem unnd nicht mehr orttenn feil habenn sollenn. Hiemitt soll auch die hockelei in thoren vorbottenn sein unnd pleibenn.

Item die hockenn sollenn sich der vorkeufferei inn unnd ausserhalb der stadt gantzlich enthaltenn, inn den nahen unnd anderern dorffern, die auff unnd innerhalb der meile wegs von hier gelegenn unnd teglich essende wahrenn unnd anders herein zu bringenn pflegenn, nichts besprechen, auch denn pauersleuthenn fur die thor nicht entgegen lauffenn noch aufm freien marckte denn leuthenn furgreifenn, sondern mitt irem keuffenn, biß der seiger eilff geschlagenn, warttenn.

Waß die Behmenn anhero pringenn, es sey waß es wolle, damit sollenn sie sich bey dem vorordentenn gleitzman unnd richter ann der Elbenn angebenn, drey sonnenschein vormuge dieser stadt wilkhur feil habenn unnd fur der zeit weder denn einheimischen noch andern hocken unnd vorauffkeuffern nichts vorkeuffenn und nach den drey sonnenschein nichts entzeln sondern hauffenweiß vorkeuffenn unnd nichts einsetzenn.

Alleß waß man inn diese stadt zu vorkeuffen furet unnd treggt, es sey waß es wolle, das soll auff freien marcktt gebracht unnd menniglich zu keuffenn furgestellet wurdenn.

Unnd hiemitt soll das schedliche unnd schandliche entgegenlauffenn fur die thor unnd in den gassenn, auch das haussiren gehenn mitt fisch, vogeln, butter, kese und anderm menniglich gantzlich vorbottenn und kein hauß inn des raths bottmessigkeit gelegenn, es wohne dorinnen edel oder unedel, dessen befreiet sein. Alles wie obsteht bey vorlust der wahrenn, es sey auch waß es wolle, halb denn auffsehenn, welche darzu vorordnet wurdenn, unnd die ander helffte inn die spittal zu nhemenn.

So sollenn auch die wechter in thoren iderman in hereingehenn unnd fahrenn dafur warnenn, das sie keinenn standt haltenn unnd sie selbst keinenn marcktt noch kauff machenn.

#### Von dem zugemuse unnd obst.

Unnd das menniglich von denn pauersleuthenn nicht ubersatzt werde, soll rubenn, krauth, arbeits, heidekornn, grutze, hanff, mahn, öpffel, birnenn, quittenn unnd anders idesmahls nach gelegenheit der